

## СЕПТЕМВРИА В 26-Й ДЕНЬ.

СЛУЖБА ИЖЕ ВО СВЯТЫХ ОТЦУ НАШЕМУ СВЯЩЕННОИСПОВЕДНИКУ ТИХОНУ,  
ПАТРИАРХУ ВСЕРОССИЙСКОМУ

### НА ВЕЛИЦЕЙ ВЕЧЕРНИ

Блажен муж: 1-й антифон.

На Господи, воззвах: стихиры, глас 6:

**З**емля Псковская прославися, \* яко в малем селении Клине \* от благочестиваго корене плод благокрасен прозябе, \* Василий, отроча блонравное, \* святителю Великому тезоименитое. \* В сем же имени велий, яко царственный, \* путь ему преднаречеса.

**Б**лагочестивый иерей Иоанн, отец твой, святителю, \* откровения дивнаго сподобися, \* егда мати его почившая \* во сне ему явися \* и ты, еще ти отроку сушу, \* единого от триех братий \* велика преднарече.

**И**змлада церковь Божию возлюбив \* и благочестия вожделев, святе, \* в духовном вертограде \* во слове Божий \* и отеческих и благочестивых писаниих, \* начат поучатися.

**Ч**то убо сотворю, \* киим образом жития моего \* Тебе, Владыце и Богу, добре послужу, \* киими подвиги, Тебе содействующу, \* душу мою от грех очищу? \* – в меру возраста пришед, \* слезно взывал еси ко Господу, блаженне.

Слава, глас 8:

**П**уть девства, нищеты, \* своя воли отсечения \* избрал еси, блаженне, \* иноческое пострижение прияв, \* в немже именем Тихон наречен бе, \* да путем благочестия святителя Задонскаго шествуеш.

И ныне, Богородичен:

**Ц**арь Небесный, за человеколюбие на земли явися, \* и с человеки поживе: \* от Девы бо Чистыя плоть приемый, \* и из Нея прошедый с восприятием. \* Един есть Сын, сугуб естеством, \* но не Ипостасию. \* Темже совершенна Того Бога и совершенна Человека \* воистину проповедающе, \* исповедуем Христа Бога нашего: \* Егоже моли Мати Безневестная, \* помиловатися душам нашим.

Вход. Прокимен дне. И чтения 3.

На литии стихиры, глас 3:

**В**о граде Торопце, \* во храме Божии, \* идеже родитель твой служаше, \* благочестию в юных летех \* поучался еси, святителю.

**Т**их нравом, \* кроток и смирен сердцем \* воистинну пред Богом и людьми явился еси, \* иго Христово чрез все житие добре пронеся, \* во обителях небесных упокоился еси, блаженно, \* молися ныне и о нас, \* да и мы на земли добре поживше, \* Царствия Божия наследники быти сподобимся.

Слава, глас 8:

**Б**ог тя возвеличи, святителю отче Тихоне, \* Первоиерарха Церкви Своея поставив, \* ты же жребий служения сего \* яко волю благую Его восприим, \* в первосвятительством подвиже твоём \* присно ревновал еси о славе, - \* Отца и Сына и Святаго Духа - \* Троицы Единосущныя и Нераздельныя.

**И ныне, Богородичен, глас тойже:**

**К** Тебе, о Богомати, \* вси ныне слезно взываем: \* вонми предстательству святителя Тихона о нас \* и Сыну Твоему молитвы вознеси \* о спасении душ наших.

**На стиховне, стихиры, глас 2:**

**Я**коже свеща на свещнице светит всем, \* тако ты, благочестием сияющ, блаженне, \* поставлен бысть Господем во епископа земли Холмския, \* да светом Христова учения \* осияваеши люди, в ней живущия.

**Стих: Уста моя возглаголют премудрость, и поучение сердца моего разум.**

**Б**ог благослови и освяти тя, земле Американская, \* православным бо людем твоим во ограде Российской Церкви сущим \* блаженнаго Тихона епископа даде, \* той многими храмы лице твое украси \* и яко богомудрый священноначальник \* паству свою ко Христу приведе.

**Стих: Благовестих правду Твою \* в церкви велице.**

**С**вятити вси земли Ярославския, \* сретайте иерарха добра, \* Тихона блаженнаго, \* той бо, якоже и вы, многия труды zde понесе, \* и ныне тщится вкупе с вами молиться Христу Богу \* спастися душам нашим.

**Слава, глас 4:**

**Земля Литовская прославися \* пришествием твоим, блаженне, \* людие же православнии, \* в ней сущий, \* яко светильника веры и благочестия ты прияша \* и в поклонении Триединому Богу тобою утвердишася, \* святительский же омофор твой \* надежный покров и защита \* от злых обстояний тем явися.**

**И ныне, Богородичен, глас тойже:**

**П**ризри на моления Твоих раб, Всенепорочная, \* утоляющи лютая на ны востания, \* всякия скорби нас изменяющи, \* Тя бо едину твердое и известное утверждение имамы \* и Твое предстательство стяжахом, \* да не постыдимся, Владычице, Тя призывающии, \* потщися на умоление Тебе верно вопиющих: \* радуйся, Владычице, всех Помоще, \* Радосте и Покрове, \* и Спасение душ наших.

**Тропарь, глас 1:**

**А**постольских преданий ревнителя \* и Христовы Церкви пастыря добраго, \* душу свою за овцы положившаго, \* жребием Божиим избраннаго \* Всероссийскаго Патриарха Тихона восхвалим \* и к нему с верою и упованием возопиим: \* предстательством святительским ко Господу \* Церковь Русскую в тишине соблюди, \* расточенная чада ея во едино стадо собери, \* отступившия от правыя веры к покаянию обрати, \* страну нашу от междоусобныя брани сохрани \* и мир Божий людем испроси.

## НА УТРЕНИ

На Бог Господь: тропарь святителю, глас 1:

**А**постольских преданий ревнителя \* и Христовы Церкви пастыря доброго, \* душу свою за овцы положившаго, \* жребием Божиим избраннаго \* Всероссийскаго Патриарха Тихона восхвалим \* и к нему с верою и упованием возопиим: \* предстательством святительским ко Господу \* Церковь Русскую в тишине соблюди, \* расточенная чада ея во едино стадо собери, \* отступившия от правыя веры к покаянию обрати, \* страну нашу от междоусобных брани сохрани \* и мир Божий людем испроси. . [Дважды.]

Слава, и ныне, Богородичен.

По 1-м стихословии седален, глас 2:

**Ж**езл первосвятительский дерзновенно приял еси, святе, \* да яко добрый пастырь, не боязненно в подвизе твоём шествуя, \* заблуждшая горохищная овчата обрящещи, \* татиями похищенная во двор овчий паки возвратиши, \* многоразличными болезнями и недуги обдержимыя добре уврачуеши \* — и все Христово стадо словесных овец \* в истине и правде упасеши.

Слава, и ныне, Богородичен, глас тойже:

**П**окрый нас всемогущим Покровом Твоим, \* Всемиловитая Владычице Богородице, \* защити нас от всяких сетей вражиих, \* дадеся бо Ти благодатная сила, \* яко рождшей Владыку Христа и Спаса душ наших.

По 2-м стихословии седален, глас 5:

**Б**лагодарение Богу \* воздадите, людие российстии, \* Той бо пробавил есть милость Свою вам, \* Тихона блаженнаго \* Первоиерарха Церкви Своя постави, \* да во дни испытаний \* обрящете в нем образ веры \* от наветов вражиих неколеблемы, \* неложнаго упования на помощь Божию \* и любовию Христовою исполненный.

Слава, и ныне, Богородичен, глас тойже:

**У**толи, Владычице, \* болезни душ наших. \* Радостию благодатною о Тебе исполни сердца наша, \* на Тя бо надеющийся \* причастницы жизни вечныя будем.

По полиелеи седален, глас 8.

Подобен: О преславнаго чудесе.

**П**риидите, вернии, \* согласно веи восхвалим святителя предивнаго, \* священноначальника Церкви Российския богомудраго, \* Тихона блаженнаго, \* иже достойно иго Христово \* чрез все житие свое понесе, \* и ныне во обителях Отца Небеснаго водворився, \* молится о спасении душ наших.

Слава, и ныне, Богородичен:

**Б**уди благословен день и час, \* вонь же благоволи Господь Тобою, Пречистая Богородице, \* явити Спаса миру, \* сим же нам имети Тя яко дерзновенную Предстательницу и Ходатаицу пред Сыном Твоим \* о спасении душ наших.

Степенна, глас 4. Антифон 1-й, ихже стихи повторяюще поем:

От юности моя \* мнози борют мя страсти, \* но Сам мя заступи, \* и спаси Спасе мой.

Ненавидящии Сиона, \* посрамитесь от Господа, \* яко трава бо огнем \* будете изсохше.

Слава: Святым Духом \* всяка душа живится, \* и чистотою возвышается, \* светлеется Троическим Единством священнотайне.

И ныне, тойже.

Прокимен, глас 4:

Прокимен: Вознесох избраннаго \* от людей Моих.

Стих: Елеем Моим помазах его.

Всякое дыхание:

Евангелие от Иоанна, зачало 36.

Рече Господь ко пришедшим к Нему иудеем: Аз есмь дверь, Мною аще кто внидет, спасется, и внидет, и изыдет, и пажить обрящет. Тать не приходит, разве да украдет, и убьет, и погубит, Аз приидох, да живот имут и лишше имут. Аз есмь пастырь добрый, пастырь добрый душу свою полагает за овцы. А наемник, иже несть пастырь, емуже не суть овцы своя, видит волка грядуща и оставляет овцы, и бегаєт, и волк расхитит их, и распудит овцы. А наемник бежит, яко наемник ест и не радит о овцах. Аз есмь пастырь добрый, и знаю Моя, и знают Мя Моя. Якоже знает Мя Отец, и Аз знаю Отца, и душу Мою полагаю за овцы. И ины овцы имам, яже не суть от двора сего, и тыя Ми подобает привести, и глас Мой услышат, и будет едино стадо, и един Пастырь.

По 50-м псалме

Слава: Молитвами апостолов, \* Милостиве, очисти \* множества согрешений наших.

И ныне: Молитвами Богородицы, \* Милостиве, очисти \* множества согрешений наших.

Таже, глас 6: Помилуй мя Боже \* по велицей милости Твоей, \* и по множеству щедрот Твоих \* очисти беззаконие мое.

Стихира, глас 6:

Церковь Божию и чад ея преискренне любяй, \* и к пользе тых деяния своя всемерно направляя, \* жертвенно и дерзновенно, \* якоже древле Моисей, \* Господу взывал еси, святителю: \* уне мне, Владыко, \* да забвению предастся имя мое в человецех, \* но спасена будет Церковь Твоя во отечестве моем \* и иссякнут потоцы крови мучеников, \* землю Российскойю обильно обагрившия.

Канон святителю, глас 6

Песнь 1

Ирмос: Яко по суху пешешествова Израиль, \* по бездне стопами, \* гонителя фараона \* видя потопляема, \* Богу победную песнь поим, вопияше.

**Я**коже плод красный спасительнаго сеяния Божия \* явился еси в Церкви, святителю Христов, \* родителей благочестивых, иерея Иоанна и Анны, быв отрасль предивная.

**П**редречение дивное во сне отцу твоему о грядущем величии твоём, еще ти отроку сушу, по мнозех летех сбытся, \* зане воистинну Великим Господином Российския Церкви явился еси, блаженне.

**О**браз кротости, смирения и любви о Господе являя, \* добрый помощник юным другом твоим был еси, блаженне, \* сего ради и тыя, еще ти отроку сушу, архиерея Божия прорекоша ты.

**Богородичен:** Спаси нас от всяких бед, \* Всемиловитая Владычице Богородице, \* и Твоими молитвами к Сыну Твоему и Богу нашему \* исцели от греховныя болезни страждущия души наша.

### Песнь 3

**Ирмос:** Несть свят, \* якоже Ты, Господи Боже мой, \* вознесый рог верных Твоих, Блаже, \* и утвердивый нас на камени \* исповедания Твоего.

**В** вертоградех духовных, православно богословити и слово Божие иными языки глаголати поучался еси прилежно, блаженне, \* и сие в церковном служении твоём добрый плод принесе.

**Е**гда Владыка Господь объятия отча отверзе ти и яко возлюбленна сына, во иночестве Тихона прият ты, \* таже и начальника в вертоградех духовных Пскова и Казани поставити ты благоволи, \* да православныя отроки богомудрию и христианскому благочестию научиши, блаженне.

**Х**олмскую паству добре управити призва ты Владыка Христос, \* темже и начало положи святительским подвигом твоим, \* да в них укрепляясь, изряден архиерей Всероссийския Церкви явишися, блаженне.

**Богородичен:** Множества грехов люто обдержат души наша. \* Ты же, Пречистая Богомати, молитвами Твоими ко Иже от Тебе Рождшемуся, пленения сего греховнаго избави и на стезю спасения настави нас.

### Седален, глас 1:

**Д**оброму евангельскому пастырю подражая, \* дерзновенно во двор овчий вшел еси, святителю, \* и своя овцы глашая по имени, \* во ограде церковней тыя невредимом соблюл еси.

### Слава, и ныне, Богородичен, глас тойже:

**К** Тебе, о Богомати, \* молитвенно мы ныне прибегаем \* и предстательства Твоего пред сыном Твоим \* усердно просим \* от греховнаго ловительства сохрани нас \* и на путь спасения настави.

### Песнь 4

**Ирмос:** Христос моя сила, \* Бог и Господь, \* честная Церковь боголепно поет, взывающи \* от смысла чиста, о Господе празднующи.

Смотрению Божию следуя, \* велению матере Церкви повинуюся, \* земли дальния Американския достигл еси \* и тамо новую паству — людей алеутских, креольских, кенарских — во ограде Христовы Церкви яко добрый пастырь соблюл еси, \* Тихоне блаженне.

Радуйтесь и веселитесь верныя чада Церкви Российския, иже в Пенсильвании, Калифорнии, Флориде и иных землях Американских сущи, \* святитель бо Тихон ныне престолу Божию предстоит и молится о спасении душ наших.

Кронштадтскаго пастыря \* собеседник быти сподобился еси, блаженне, \* еще сый епископ града Ярославля, \* и той ти всероссийское пастырство предуказа. \* Темже и ныне с ним престолу Божию предстоя, \* моли спастися душам нашим.

**Богородичен:** Достояно есть прославляти Тя, Владычице, \* присно спасающую землю Российскую. \* Се бо и святитель Тихон в Ярославстем храме Успения Твоего, \* государя Николая, яко истиннаго помазанника Божия срете \* и благодарственныя молитвы вкупе с ним о заступлении отечества нашего \* Тебе и Сыну Твоему принесе.

### Песнь 5

**Ирмос:** Божиим светом Твоим, Блаже, \* утренюющих Ти души любовию озари, молюся, \* Тя ведети, Слове Божий, \* Истиннаго Бога, \* от мрака греховного взывающа.

Егда по грехом нашим нашествие иноплеменных Господь попусти, \* и земля Российская кровию обогрися, \* ты, святителю, покаяние проповедуя, \* и врачевству душевному и телесному страждущих добре содействуя, \* крепче стояти за веру православную, \* царя благовернаго и отечество святое призывал еси.

Ополчению вражеску у стен града Вильно стоящу, \* цельбоносныя мощи святых мученик Антония, Иоанна и Евстафия \* из обители Святаго Духа благоговейно изнесл еси, святителю, \* и во граде Москве \* от поругания иноземных невредимы сохранил еси.

Благоволением Божиим и народа Божия избранием \* Московским архипастырем поставлен был еси, святе, \* темже и достойный приемник Московских святителей явился еси.

**Богородичен:** Ангельский собор и человеческий род о Тебе радуется, Благодатная Марие, \* Мати Неискусомужная, \* Невместимаго бо во чреве вместила еси \* и родила еси Спаса миру.

### Песнь 6

**Ирмос:** Житейское море, \* воздвигаемое зря напастей бурей, \* к тихому пристанищу Твоему притек, вопию Ти: \* возведи от тли живот мой, \* Многомилостиве,

Пустынножитель-старец пред образом Владычицы усердно моляся, \* жребий со трепетом из ковчезца извлече, \* на немже имя твое, \* яко Богом избраннаго Первосвятителя, начертано бе, \* сего ради и мы ныне, якоже тогда иерархи Собора, немолчно "аксиос" тебе, архипастырю наш, вопием, \* сотвори и нас яко словесныя овцы достойны быти пажити твоея.

**О** глубины богатства и премудрости Божия! \* Изволися Духу Святому со иерархи \* поставити тя, блаженне, Патриарха Церкви Российския, \* да во дни испытания веры \* свидетельствующи крепкое в ней стояние \* и паству твою неврежденну \* от наветов вражиих добре соблюдеши.

**О** неизреченныя любви и милосердия Божия! \* святитель Тихон во главу Российския Церкви поставляется \* и мнози людие \* добраго пастыря обретают, \* и во ограде церковней соблюдаются.

**Богородичен:** Радуются и ликуют людие российстии, Приснодево, \* Введение Твое во храм празднующе, \* и возведение святителя Тихона Патриархом Российским \* в сей же день благодарно воспоминающе, \* усердно зывают Ти: \* О Владычице Державная, \* молитвами святителя Тихона \* Церковь и землю Российскую \* от всех наветов вражиих спаси \* и вся верныя в чертоги небесныя введи.

### Кондак, глас 2:

**Т**ихостию нрава украшен, \* кротость и милосердие кающимся являяй, \* во исповедании православныя веры и любви ко Господу \* тверд и непреклонен пребыл еси, \* святителю Христов Тихоне. \* Молися о нас, да не разлучимся от любви Божия, \* яже о Христе Иисусе, Господе нашем.

### Песнь 7

**Ирмос:** Росодательну убо пещь \* содела Ангел \* преподобным отроком, \* халдеи же опаляющее \* веление Божие, \* мучителя увеща вопити: \* благословен еси, Боже отец наших.

**П**лач, стенание и горе великое, \* грядущия на Церковь Российскую предзрел еси, Первосвятителю, \* обаче Христовою любовию укрепляем, \* мужественно зывал еси: \* благословен еси, Боже отец наших.

**В** лютую годину \* первосвятительский жезл со страхом и трепетом прияв, блаженне, \* Церковь Российскую яко корабль нерукотворный добре управил еси, \* верныя же научил еси зывати: \* благословен еси, Боже отец наших.

**П**ророку древнему Илии, \* взыскующу не преклоньших колена пред Ваалом, \* подражал еси первосвятителю, \* да взыщещи, \* яже не преклониша выю ловительству безбожных, \* таже и падших из глубины греховныя воздвигнеши, \* и верныя научиши в скорбных обстояниях \* зывати Господу: \* благословен еси, Боже отец наших.

**Богородичен:** Помощницу надежную имама Тя, Богородице, \* многожды бо в скорбных обстояниях \* предстательство о людех российских \* пред Сыном Твоим являла еси.

### Песнь 8

**Ирмос:** Из пламене преподобным росу источил еси \* и праведного жертву водою попалил еси: \* вся бо твориши, Христе, токмо еже хотети, \* Тя превозносим во вся веки.

**Во** образ твоего усерднаго подражания \* служению первосвятителей Московских, \* в священныя одежды тех достойно облачен был еси, блаженне, \* темже с ними о нас молися, да и мы достойны будем превозносити Господа во вся веки.

**Жезл** Первосвятителя Петра \* со дерзновением приял еси, блаженне, \* да образ власти предстоятеля в Церкви Российской воставиши. \* Мы же ведяще сицевую милость Божию к нам, \* Господа превозносим во вся веки.

**Грехом** нашим умножившимся, \* попусти Господь братоубийству \* и междоусобным бранем в земли Российской быти. \* Ты же, святителю, \* людей враждующих к покаянию и примирению призывал еси, \* научая превозносити Христа во веки.

**Богородичен:** В дому Твоем, Пречистая Дево, \* храме Успения Твоего, \* поставление блаженнаго Тихона в Первосвятителя Российскаго свершися. \* Темже молитвы того, \* яко вернаго избранника служителя Твоего, \* к Богу вознеси и спаси души наша.

### Песнь 9

**Ирмос:** Бога человеком невозможно видети \* на Негоже не смеют чини Ангельстии взирати, \* Тобою же, Всечистая, явися человеком \* Слово Воплощено, \* Егоже величающе, \* с небесными вои Тя ублажаем.

**Плачем** и рыданием \* земля Российская огласися, \* кровь святых мученик и исповедник Христовых потоки по ней излися, \* храмы Божий осквернишася и попранию предашася. \* Увы мне, Земле моя! \* — взывал еси, святителю, \* кое врачевание прилежит ти, \* да всех сих избавишися.

**Увы** мне, людие российстии! — взывал еси, блаженне. \* Господа забыхом, \* в делех наших осуежихомся, \* попечение же о души николиже имехом. \* Ей, глаголю вам, \* благоволения Божия не обрящем, \* аще души наша слезами покаяния пред Господом не потщимся очистити.

**В** темнице томящуся ти, святителю, \* о Церкви премного болезновал еси, \* иерарси бо и священницы нецьи \* на стезю Иуды предателя ступивше \* и неправедно власть в Церкви восхитивше, \* злохудожная деяния своя, яко обновления благая нарекоша; \* и сим паству Российскую в смятение приведоша \* и в нестроениях церковных тяжце повинни быша.

**Ни** скорбь, ни теснота, ни гонение, \* ни глад, ни нагота, \* ниже беда, ни меч не возмогут разлучити верных чад Христовых от любви Его \* — апостольски рекл еси, святителю.

**Богородичен:** Кия похвалы возгласим Ти, Пречистая. \* Киими словесы \* величие Твое восславим, \* яко Спаса родила еси душ наших.

### Светилен, глас 1:

**Первосвятителя** Российскаго Тихона днесь прославим, \* память его благочестно почитающе, \* той бо, яко светильник пресветлый, просиял есть \* и образом пресветлаго жития своего \* ревностному служению Богу люди научает.

**Слава, и ныне, Богородичен:**

**Р**адуйся, Богородице Дево, \* Владычице Державная, \* Светодавца Христа миру Рождающая; \* радуйся, похвало всея вселенныя; \* радуйся, Пречистая Мати Божия Благословенная.

**На хвалитех стихиры, глас 4:**

**В**ере в людех оскудевшей, \* любви истощившейся, \* надежды иссякнувшей, \* попусти Господь \* мор жесток, болезнь и глад на люди отечества нашего. \* Ты же, святителю, \* святыни Божия от поругания неверных защищая, \* о страждущих болезновал еси \* и к милосердию и жертве посильней \* от щедрот своих для оных \* всероссийскую паству призывал еси.

**С**ловеса премудра \* о еже не леты, но деяньми благими \* полнота жития человеческого пред Богом измеряется, \* на тебе исполнишася святителю. \* Темже душу добродетельми обогачену имея, \* в Небесныя обители вселился еси, \* идеже молишися о нас присно.

**В**нимайте убо себе, \* людии российстии! \* Пробави бо Господь ныне милость Свою нам: \* потоки крови мученик иссякоша, \* пленения от власти безбожных свободихомся, \* попоранныя храмы Божий восставляютя \* — бежим всемерно приражения греховнаго, \* да не паки гнев Божий наведем на ся, \* и не будет нам последняя горшка первыя.

**Слава, глас 8:**

**К**ровми святых мученик \* Церковь Христова древле утвердися, \* такожде и во дни твоя, святителю Тихоне, \* во отечестве нашем яко потоцы водныя, \* кровь святых мученик пролияся, \* обаче смотрением Божиим \* сия семенем явися, \* из негоже прозябе благосеннолиственное древо Руси Православныя.

**И ныне, Богородичен:**

**П**речистая Дево Мати, \* благоволила еси святителю Тихону в день благовестия Ти Архангела Гавриила \* поприще земнаго пути его скончати \* и яко избранника Твоего в небесных чертозах вселити. \* Темже, о Богомати, \* молитвы святителя Тихона \* о страждущей стране Российстей и людех ея \* к Сыну Твоему и Богу вознеси \* и спаси души наша.

**Славословие великое**

**Тропарь, глас 1:**

**А**постольских преданий ревнителя \* и Христовы Церкви пастыря добраго, \* душу свою за овцы положившаго, \* жребием Божиим избраннаго \* Всероссийскаго Патриарха Тихона восхвалим \* и к нему с верою и упованием возопиим: \* предстательством святительским ко Господу \* Церковь Русскую в тишине соблюди, \* расточенная чада ея во едино стадо собери, \* отступившия от правыя веры к покаянию обрати, \* страну нашу от междоусобныя брани сохрани \* и мир Божий людем испроси.

**И ныне, Богородичен:**

**И**же нас ради Рождейся от Девы, \* и распятие претерпев, Благий, \* испровергий смертию смерть, и Воскресение явлей, яко Бог, \* не презри, яже создал еси рукою Твоею, \* яви человеколюбие Твое, Милостиве, \* прими Рождшую Тя Богородицу, молящуюся за ны, \* и спаси, Спасе наш, люди отчаянныя.

**и отпуст.**

## На Литургии

Блаженны от канона, песни 3-я и 6-я.

**В** вертоградех духовных, православно богословити и слово Божие иными языки глаголати поучался еси прилежно, блаженне, \* и сие в церковном служении твоём добрый плод принесе.

**Е**гда Владыка Господь объятия отча отверзе ти и яко возлюбленна сына, во иночестве Тихона прият тя, \* таже и начальника в вертоградех духовных Пскова и Казани поставити тя благоволи, \* да православныя отроки богомудрию и христианскому благочестию научиши, блаженне.

**Х**олмскую паству добре управити призва тя Владыка Христос, \* темже и начало положи святительским подвигом твоим, \* да в них укрепляясь, изряден архиерей Всероссийския Церкви явишися, блаженне.

**М**ножества грехов люто обдержат души наша. \* Ты же, Пречистая Богомати, молитвами Твоими ко Иже от Тебе Рождшемуся, пленения сего греховнаго избави и на стезю спасения настави нас.

**П**устынножитель-старец пред образом Владычицы усердно моляся, \* жребий со трепетом из ковчезца извлече, \* на немже имя твое, \* яко Богом избраннаго Первосвятителя, начертано бе, \* сего ради и мы ныне, якоже тогда иерархи Собора, немолчно "аксиос" тебе, архипастырю наш, воишем, \* сотвори и нас яко словесныя овцы достойны быти пажити твоея.

**О** глубины богатства и премудрости Божия! \* Изволися Духу Святому со иерархи \* поставити тя, блаженне, Патриарха Церкви Российския, \* да во дни испытания веры \* свидетельствующи крепкое в ней стояние \* и паству твою неврежденну \* от наветов вражиих добре соблюдеши.

**О** неизреченныя любви и милосердия Божия! \* святитель Тихон во главу Российския Церкви поставляется \* и мнози людие \* добраго пастыря обретают, \* и во ограде церковней соблюдаются.

**Р**адуются и ликуют людие российстии, Приснодево, \* Введение Твое во храм празднующе, \* и возведение святителя Тихона Патриархом Российским \* в сей же день благодарно воспоминающе, \* усердно зывают Ти: \* О Владычице Державная, \* молитвами святителя Тихона \* Церковь и землю Российскую \* от всех наветов вражиих спаси \* и вся верныя в чертоги небесныя введи.

### Тропарь, глас 1:

**А**постольских преданий ревнителя \* и Христовы Церкви пастыря добраго, \* душу свою за овцы положившаго, \* жребием Божиим избраннаго \* Всероссийскаго Патриарха Тихона восхвалим \* и к нему с верою и упованием возопиим: \* предстательством святительским ко Господу \* Церковь Русскую в тишине соблюди, \* расточенная чада ея во едино стадо собери, \* отступившия от правыя веры к покаянию обрати, \* страну нашу от междоусобныя брани сохрани \* и мир Божий людем испроси.

### Кондак, глас 2:

**Т**ихостию нрава украшен, \* кротость и милосердие кающимся являяй, \* во исповедании православныя веры и любви ко Господу \* тверд и непреклонен пребыл еси, \* святителю Христов Тихоне. \* Молися о нас, да не разлучимся от любви Божия, \* яже о Христе Иисусе, Господе нашем.

### Прокимен, глас 4:

**Ч**естна пред Господом смерть преподобных Его.

**Стих:** Что воздам Господеву о всех, яже воздаде ми.

### Апостол к Галатам, зачало 213.

**Б**ратие, плод духовный есть любви, радость, мир, долготерпение, благодать, милосердие, вера, кротость, воздержание: на таковых несть закона. А иже Христовы суть, плоть распяша со страстьми и похотьми. Аще живем духом, духом и да ходим. Не бываем тщеславни, друг друга раздражающе, друг другу завидяще. Братие, аще и впадет человек в некое прегрешение, вы духовнии исправляйте такового духом кротости: блюдыи себе, да не и ты искушен будещи. Друг друга тяготы носите, и тако исполните закон Христов.

**Аллилуя, глас 6:** Блажен муж, бояйся Господа, в заповедех Его восхощет зело.

**Стих:** Сильно на земли будет семя его.

### Евангелие Иоанна, зачало 36:

**Р**ече Господь ко пришедшим к Нему иудеем: Аз есмь дверь, Мною аще кто внидет, спасется, и внидет, и изыдет, и пажить обрящет. Тать не приходит, разве да украдет, и убьет, и погубит, Аз приидох, да живот имут и лишше имут. Аз есмь пастырь добрый, пастырь добрый душу свою полагает за овцы. А наемник, иже несть пастырь, емуже не суть овцы своя, видит волка грядуща и оставляет овцы, и бегаєт, и волк расхитит их, и распудит овцы. А наемник бежит, яко наемник есть и нерадит о овцах. Аз есмь пастырь добрый, и знаю Моя, и знают Мя Моя. Якоже знает Мя Отец, и Аз знаю Отца, и душу Мою полагаю за овцы. И ины овцы имам, яже не суть от двора сего, и тыя Ми подобает привести, и глас Мой услышат, и будет едино стадо, и един Пастырь.

**Причастен:** В память вечную: